

13 DEC 2002

Rumah terbuka-Aidilfitri

RUMAH TERBUKA AIDILFITRI MALAYSIA DI JITRA 21 DIS

KUALA LUMPUR, 13 Dis (Bernama) -- Rumah Terbuka Malaysia sempena Hari Raya Aidilfitri akan diadakan di Taman Tasik Bandar Darulaman di Jitra, Kedah pada 21 Dis, menurut Kementerian Kebudayaan, Kesenian dan Pelancongan hari ini.

Majlis yang bermula pada pukul 6 petang itu akan memaparkan keunikan sambutan Perayaan Hari Raya Aidilfitri oleh masyarakat Islam di negara ini, kata kementerian itu dalam kenyataan di sini.

Sambutan rumah terbuka peringkat nasional itu juga akan turut meningkatkan toleransi beragama, memupuk perpaduan dan persefahaman di kalangan rakyat serta mengeratkan hubungan antara pemimpin negara dengan rakyat, katanya.

Sambutan yang bermisikan "Malaysia Negara Pelancongan: Berfestival, Berkarnival dan Ceria Sepanjang Masa" itu dianggarkan turut dihadiri oleh seramai 100,000 orang pengunjung dalam dan luar negara.

Yang di-Pertuan Agong, Tuanku Syed Sirajuddin Syed Putra Jamalullail dan Raja Permaisuri Agong, Tuanku Fauziah Tengku Abdul Rashid serta Sultan dan Sultanah Kedah dijangka berangkat ke majlis itu.

Perdana Menteri Datuk Seri Dr Mahathir Mohammad dan Timbalan Perdana Menteri Datuk Seri Abdullah Ahmad Badawi serta Perdana Menteri Thailand Thaksin Shinawatra dan para menteri kabinet Malaysia dan Thailand juga dijangka hadir.

Majlis itu akan dimeriahkan dengan persembahan bunga api berirama, acara kesenian dan hiburan serta nyanyian oleh penyanyi terkenal tanah air seperti Siti Norhaliza, KRU, Era Fazira.

Artis Thai termasuk Narumou Chivagkur dan Sobchai Krai Yoon Sen juga dijadual akan mengadakan persembahan pada majlis itu.

-- BERNAMA

AFH MFJ NMO